

開放文學 – 歷代筆記 – 夷堅丁志

卷第一

序 凡甲丁四書·為千一百有五十事·亡慮三十萬言·有觀而笑者曰·詩書易春秋·通不贏十萬言·司馬氏史記·上下數千載·多才八十萬言·子不能玩心聖經·啟矚門戶·顧以三十年之久·勞動心口耳目·瑣瑣從事於神奇荒怪·索墨費紙·殆半太史公書·曼漶支離·連芥叢穢·聖人所不語·楊子雲所不讀·有是書不能為益毫毛·無是書於世何所欠·既已大可笑·而又稽以為驗·非必出於當世賢卿大夫·蓋寒人野僧山客道士醫巫俚婦下隸走卒·凡以異聞至·亦欣欣然受之·不致詰·人何用考信·茲非益可笑與·予亦笑曰·六經經聖人手·議論安敢到·若太史公之說·吾請即子之言而印焉·彼記秦穆公·趙簡子·不神奇乎·長陵神君·圯下黃石·不荒怪乎·書荊軻事·證侍醫夏無且·書留侯容貌·證畫工·侍醫畫工·與前所謂寒人巫隸何以異·善學太史公·宜未有如吾者·子持此舌歸·姑闕其笑·他日戊志成(原闕一葉)

聖像暴露·取所餘三門·屋蔽之·而覆以茅·未幾又摧敗·路人至買簪笠·係於像頂·以遮兩日·堯卿忽得病·凡半年·四體臭腐·血液交流·痛苦萬狀·親朋問訊者·莫敢窺其戶·且死·見黃衣人來追·明言理會拆觀事·李守及象求之彰·亦相繼亡·獨堯卿受禍最酷·李蓋為所誤雲·村墟民睹咎證如此·共率錢粟·作屋三間·移像事之如故·時紹興二十七年也·後五年·予聞之於知軍向仲德士俊雲·

夷堅丁志卷第·

此葉不知何處錯簡·姑仍舊本·附列於此·心源識·

王浪仙

溫州隱者某·居於瑞安之陶山·所處深寂·以耕稼種植自供·易筮如神·每歲一下山賣卦·卦直千錢·率十卦即止·盡買歲中所用之物以歸·好事者或贖金帛·經月邀伺·然出未十里·卦已滿數·不復肯更占·郡人王浪仙·本書生·讀書不成·決意往從學·值其出·再拜於涂·便迫隨入山·為執奴僕之役·稍稍白所求·隱者亦為說大概·又舉是歲所占十卦·使演其義·王疲精竭慮·似若有得·彼殊不以為能·曰·汝天分止此·不可強進也·遣出山·然王之學固已絕人矣·有以墓域訟者求決焉·其卦遇賁·曰·為墳欠土·此不勝之兆·後逾月·前人復來·又筮之遇蒙·曰·兆非先卦比·塚上有草·當即日得直·既而盡然·西遊錢塘·時杭守喜方技·至者必厚待之·然久而乖戾·輒置諸罰·不少貸·王書刺曰·術士王浪仙·守延入·迎問曰·君名有術·曾聽五更城上鼓角聲乎·曰·聞之·其驗如何·曰·內外皆平寧·但今夕二鼓後·法當有婦人告急者·王還客舍·廂卒數人已先在·曰·君何苦來此·前後流配者·不知幾人矣·今我輩相臨·何由得脫·翌日未明·守招與言曰·昨語甚神·夜適二鼓·通判之婦就蓐·扣門來求藥·真所謂婦人告急也·自此館遇加禮·遂詢休咎·對曰·今年某月某日午時·召命下·守固篤信者·屈指以須·至期·延幕僚會飯·王生預席·守曰·王先生謂今日忝召節·諸君試共證之·食罷及午·寂無好音·坐客皆悚·既過四刻許·促問至再·王趨立廷下·觀日影·賀曰·且至矣·須與郵筒到·發封見書·果召赴闕·守謝以錢百萬·約與偕入京·王曰·遠鄙鄙人·願一識都邑·僥倖發身·但家貧特甚·俟送公上道·暫還鄉·持所賜與妻子·然後兼程而北·未為晚·守許之·既行·或問其故·曰·使君雖被召·而前程不見好處·殆難面君也·守未至國門·乃別除郡·逾年而卒·王生不知所終·

僧如勝

永嘉僧如勝·與鄉僧行腳至臨安·憩道店·見小兒鬻卦影者·勝筮之·兆雲·有玉在土中·至九月十六日當出土·兒曰·吉卦也·鄉僧得兆·畫官人挽弓射一僧·兩矢不中·後一矢貫其足·下有龍蟠·兒不能曉·僧自推之·曰·我必將以薦作長老·至三乃效耳·又龍者君象·我且游京師·庶或幸遇·未幾鎮江太守具帖疏備禮·延如勝住甘露寺·正以九月十六日·鄉僧亦喜·謂且繼此得志·數年無所成·會杭卒陳通作亂·僧避入南山·嘗出至山腰·蔽樹視下·賊黨數輩行峽中·仰高亂射·以搜伏兵·連發三矢·最後正中僧足·別一僧坐於傍·曰·隆上坐·乃始驗卦中象·無一不應雲·

左都監

修武郎左良·紹興二十八年·為婺州兵馬都監·赴幕官王作德日休晚集·歸家已夜·兩人隨之而入·至中堂乃覺·良怒曰·汝何為者·敢至此·執其一·痛捶之·首有兩角屹然·良知其陰吏也·猶不肯釋·其一從後掙良腰僕坐·遂冥冥長往·將曉乃蘇·言被追到冥府·二使方白其抗拒之罪·主者審姓名·對曰·婺州都監左良·主者曰·吾命逮左瑯·何關此人事·即放還·良行十餘步·回顧則二使者已對繫於廡間矣·明日·同官來問良疾·具說其故良嘗在張魏公府為帳下·氣乾甚偉·自再生之後·神觀索然蓋人與鬼鬥為所傷雲

許提刑

靖康冬·金人再渡河·河北提刑許亢·坐棄洛口奔潰·竄吉陽·會中原亂·不之貶所·與二子及從卒十餘人·間關至南康·不欲與州郡相聞·但入廬山一小寺棲止·僕因摘園蔬·與僧爭哄·僧密詣郡告雲·遭潰兵行劫·實繁有徒·郡守李定信之·即調兵授甲·圍其寺·盡縛亢父子·並從卒送獄·亢至廷下·大呼稱枉·且具言平生資歷·定曰·豈有曾為監司·所至不出謁而避匿者乎·論獄吏研鞫不得情·乃遣孔目吏入囚室·陽與好言探跡·具酒同飲·了無盜劫之狀·亢倉黃南來·妻妾淪落·告救不一存·無以自明·定疑不可解·亢長子善占夢·亢語之曰·吾夢父子持傘行雨中·已而大風起·吹三傘皆半裂飛去·是何祥邪·子泣曰·夢殊不吉·此父子離散為三之象也·是夕孔目又來·攜酒餽甚盛·與三許劇飲·且滿酌屬亢曰·提刑勉一醉·少頃徒兩令郎他舍矣·會罷各分囚之·過夜半·悉以鐵椎擊死·定上奏自言有除盜之功·未報而卒·凡豫其事者·一月內繼死·唯孔目獨存·鄆陵人周西瑞號嘗知南康軍·與定先後隔政·其子數聞之於孔目雲·亢以武舉得官·

夏氏骰子

夏僅·字幾道·衛州汲縣人·崇寧大觀間·居太學甚久·未成名·家故貧·至無一錢·同捨生或相聚博戲·則袖手旁觀·時從勝者覓錙銖·俗謂之乞頭是也·一夕·束帶焚香·對局設拜·曰·僅聞博具有靈·敢以身事敬卜·今年或中選·願於十擲內賜之渾化·不然·將束書歸耕·無復進矣·祝罷·即授莎擲焉·六子皆亦·夏愕喜·不敢自信·又祝曰·僅至誠齋心·以平生為禱·恐適者偶然·願更以告·復再投之·三彩皆同·乃再拜謝神祝·是歲果於莫儔榜登科·後官至中大夫·川陝宣撫司參議官·其家藏所卜骰子·奉之甚肅·右一事周穀說·

治挑生法

莆田人陳可大·知肇慶府·肋下忽蠶起·如生癩狀·頃刻間大如碗·識者雲·此中挑生毒也·俟五更以菘豆嚼試·若香甘則是·已果然·使搗川升麻為細末·取冷熟水調二大錢·連服之·遂洞下·瀉出生蔥數莖·根須皆具·蠶即消·續煎平胃散調補·且食白粥·經旬復常·雷州民康財妻·為蠻巫林公榮·用雞肉挑生·值商人楊一者·善醫療·與藥服之·食頃·吐積肉一塊·剖開筋膜中有生肉存·已成雞形·頭尾鬚翅悉尚·似康訴於州·州捕林置獄·而呼楊生·令具疾證及所用藥·其略云·凡吃魚肉瓜果湯茶·皆可挑·初中毒·覺胸腹稍痛·明日漸加攪刺·滿十日·則物生能動·騰上則胸痛·沉下則腹痛·積以瘦悴·此其候也·在上高則取之·其法用熱茶一甌·投膽礬半錢於中·候礬化盡·通口呷服·良久以雞翎探喉中·即吐出毒物·在下高則瀉之·以米飲下鬱金末二錢·毒即瀉下·乃碾人參白朮末各半兩·同無灰酒半升·納瓶內·慢火熬半日許·度酒熟·取出溫服之·日一杯·五日乃止·然後飲食如其故·

挑氣法

從事郎陳遙·為德慶府理官·鞠一巫師獄·巫善挑氣·其始與人有仇隙·欲加害·則中夜扣門呼之·俟其在內應答·語言相聞·乃以氣挑過·是人腹肚漸脹·日久腹皮薄如紙·窺見心肺·呼吸喘息·病根牢結·藥不可治·獄未成而死·江瑒鳴三作守·以事涉誕怪·不敢置於典憲·但杖脊配海南·此妖術蓋有數種·或咒人使腹中生鱉者·或削樹皮咒之·候樹復生·皮合而死者·然不得所以治法·右二事陳遙說·

南豐知縣

紹興初·某縣知縣趙某·季子二十歲·未授室·與館客處於東軒·及暮客歸·子獨宿書院·聞窗外窸窣有聲·自牖窺之·一婦人徘徊月明下·方駭詭問·已傍窗相揖·驚問雲·汝何人·竊至此·曰·我東鄰女也·慕君讀書·逾牆相從·肯容我一聽乎·欣然延入·留不使去·自是曉往夕來·子神情日昏悴·飲食頓削·父母疑而扣焉·不以告·密訊左右者·曰·但聞每夜切切如私語·又時嬉笑·久欲白而未敢·父母知為鬼所惑·徙歸同榻寢·即寂然·逾月·顏色膳飲稍復舊·一日·獨處房中·忽大呼求救·似為人掙髻而出·驅行甚速·舉家不知所為·婢僕共牽挽·而力不可制·迤邐由書院東趨後園·才出門·去愈速·將至八角大井邊·歎仆地不醒·家人共扶昇歸·移時乃能言·雲·實與婦人往還久·及徙室·不復來·今旦父母在堂上·忽見從外人·忿怒特甚·戟手肆罵曰·許時覓汝不得·原來只在此·便向前掙我髻·盡力不能脫·直造井傍·以手招井內·即有無數小鬼出·皆長三二尺·交拽我·勢且入井·俄一白鬚翁·坐小涼轎·僕從三十輩·自園角奔而至·傳呼雲·不得不得·群鬼悉斂手·翁叱曰·著棒打·僕從舉棍亂擊·皆還井中·翁責婦人曰·我戒汝不得出·那敢如是·婦低首斂衽·無一言·又曰·原有大石鎮井上·今何在·僕曰·宅內人輿將搗衣矣·咄曰·不合動著·鞭婦人數十·罵之曰·汝安得妄出·為生人害·況郎君自有前程耶·逐入井·命別扛巨石塞於上·告我曰·吾乃土地也·來救郎君·郎君性命幾為此鬼壞了·歸語家中人·此石不可動也·語罷後·升轎去·此子後得官·仕至南豐宰·金陵邸